

## POLOTE LETA GALESIYA Opono SOSI EPATAMO OSIYODILIYA

<sup>1</sup> Na Polotela, Ya:su Kelisote ebeno sosi wagilima: iyaiya opamo daliboliya, ebe wokopi magumulo na idila, iyo, potele ebe a:e magumune dadipatiya, ebe Nabiwi Godote eba:go na ebe woko kosiyodilonama: eka:na:miya, lumagi idino ubi tanalodoa: <sup>2</sup> Na ega:walo nago dilukulina ebe nanitabokobi midipi ekaki, ale la: piyate Galesiya opono iyaiya sosi epoma: deda:wenama, ale me leta la: bilibilinomatamo paliboma:.

<sup>3</sup> Modobola aimano Nabiwi Godoko ega:walo Kawodawa Ya:su Kelisoko iba:te ibino nilakapo tanalo ega:walo milo tanalo la:tamo nikalaema:ta. <sup>4</sup> Nanitabola, Kelisote aimano Nabiwi Godokono ubi tanalamo tuduwatalo aimano kuba osiyodilole mabuma: ebeno igilo iyabaiamo iyatiya, ebete a me opono kawokawo kubano elawo magumune kowagaima: ☆

<sup>5</sup> Ebema: modobola Godogodolo amama tanalote uwomua: tetelo nitanamene. Me tabo nanitabonomola, taula!

*Godokono Wade Tabote Igilo Mula: Gabo Kapiyanomo Awokalimina*

<sup>6</sup> Me tetelo nale la: mabuma: kawonomamo nela:wa:namo, mabu la:le igilo mula: gabo idino a:da: tabo dolowiaima, ebema: la:le Wade Tabone

---

☆ **1:4:** Gal 2:20

olobila:wete potele Kelisokono nilakapo tanalodo la: deka:la:mitia, ebe Kawodawa samonomamo atepama: wagelenamata. <sup>7</sup> La: wadenomamo nolowiala:, igilo mula: gabo idite nanitabolo kitanana! Wiyasiya epetapiate Kelisokono Wade Tabo kubaima: eba wagelenalo, iba:te iya gabo idima: tabo kiyawaote woki bilibili tanalo la:tamo ebema: ikalamenata. ✧ <sup>8</sup> Eiyee! Nale dopamo tetelo kebe Wade Tabo la:tamo da:pa:kiyawaimo, potele ebe tabo iyakobi midite igilo mula: gabo idi dawokalimene, modobola Godote ebe Saitanakono Ela Opamo gito nalibomene! Ebene Unu Duliyomolono nopopi magumulo idite ebe atu kawo kuba tanalonomo dosiyodilomene, iyo, na atumu, modobola aimano kuba wiyate eba kunu atamo atumu na:ka:pemene. ✧ <sup>9</sup> Ebema: ale dopamo la: kebe tanalo ka:kiyawaolametia, nale ebe atu tanalo la: walo ma kunu kanalemata, la:le dopamo kebe Wade Tabo kelawa:ima, potele ebe tabo iyakobi midite iya igilo mula: gabo idi dawokalimene, modobola Godote ebe Saitanakono Ela Opamo gito nalibomene!

<sup>10</sup> Numa:la:, me tabo kiyawao magumulo nale opo lumagi idi kalakalaima: kowagelena:, ega:walo nale lumagi idigodolo na moione tabo olowima: ubi kiyatina:. Ao, eba kunua:, Godote naimano tanaloma: dekalakalana, nale ebe ubi kapiyamo iyatinamo! Nanitabola, dopamo nale me opo epo epetapi bilibilinomo kalakalailaema: wagelenaimo, wiyasiya me tetelo na modoboa: eba kunu wagelenama: mabu nale woko Kelisoko

---

✧ **1:7:** Ali 15:1,24 ✧ **1:8:** 1Kol 16:22

kapiyatamo osiyodilonamo, lumagi iditamoa: ✧

*Polote Iyaiya Opolo Sosi Wagilimi Woko Osiyodiloma: Godote Ebe Keba Kunu Keka:miyale*

<sup>11</sup> Naimano nanitabokobi midipi ekakiala:, na ubila la: me tanalo idi wadenomamo niyatawala:, nale kebe Wade Tabo ka:kiyawaonakomo, ebe Tabote opo lumagi idino wokino tanalone ke-maigiya:. ✧ <sup>12</sup> Iyo, nale ebe Tabo me opo epo magumulo iyatulamedawa idigodone kelawiya:, wiyasiya nanitabola, Ya:su Kelisote a:ka:tuwa: ebe Tabo natamo ikanamete ebenu magumu ebo awokalimiya.

<sup>13</sup> La: dopamo me tanalo olowimata, naimano tagala okoli magumulo nale Godoko amamatema: Yu epono osiyodilole tanalo bilibilinomo keba kunu kowaloma:talenakimo. Numa:la:, ebe tetelo nale Yu watowatopi epetapiago Godokono nani sosino epo kubanomamo kubailaema: kawokawo temeteme iba:tamo nanitabonomolo ikalamenakima:. ✧ <sup>14</sup> Ega:walo naimano Yu epo epetapiate Godoko amamatema: nale ibino osiyodilole magumulo ibi eba iyatulamenalo ibi magumulo kawodawa idima: ebo ediyamo, mabu nanitabola, a Yu epono ewoniate atamo kebe iyaiya pukala kikaemiye, nale ebe pukala bilibilinomamo tuduwatalo elawonomoma: eba eda:nalo, naimano elawo tanalote naimano ape-gabo dubu bilibilinomono elawo gito nodoiliya. ✧

<sup>15</sup> Wiyasiya kalakala kawonomola, nale naimano menokono tepone awokala:no, dopamo Godote ebenu nilakapo tanalodo na ka:na:mite

---

✧ **1:10:** 1Tes 2:4 ✧ **1:11:** Ma:t 16:17 ✧ **1:13:** Ali 8:3 ✧ **1:14:** Ali 22:3

ebo laweniya, nale walone tetelo Yu epono osiyodilole tanalo magumune pemaigate ebene nani woko kosiyodilonama:. Ega:walo nale ibino osiyodilole magumulo eba okolinalo, ebete atu ubi tanalo walo ma kunu kiyatiya, ✧<sup>16</sup> ebene Guduno tanalo natamo awokalimite, ebene nale tote Yua:piatamo Wade Tabo eba na:kiyawaolo iba:te ebene tanalo atumu wadenomamo kiyatawaoma:. Ebene ebe tanalote natamo da:pemaigiya, nale naimano namutupi magumulo lumagi iditamoka:tiya:, nale keba kunu ka:nosiyodilomo ebe woki ebegodone ka:nelaema:.<sup>17</sup> Ega:walo Yelusalema kawo duliyomololo dilukulionamiya, nale ebe Ya:sukono alibolepi epetapino woki laema: iba:tamo atumu ka:tiya:. Iyo, na iyatawiyamo Ya:sute na ka:na:mia:no ebete ebe dubu dopamo eka:la:miya, wiyasiya nale iba:tamo nemaiga:no Ala:biya bulu opamo tote, na a:ka:tuwa: ebolo nokoliatepate ebene Dama:sakase kawo duliyomolamo walo gito kolowamiyamo.

<sup>18</sup> Ebene netewa-kapiya ulama da:petoiya, ebe tetelo nale Pitago tabo gelama: Yelusalemamo tote eba:go netewa wuika:mo eba nokoliatepalo, ✧<sup>19</sup> wiyasiya alibolepi dubu epetapi magumulo nale idi kapiyanomo ebo numiyamo, ebe dubu ebe Kawodawa Ya:sukono ekawi Ya:imesitela.<sup>20</sup> La: nolowiala:, nale me leta magumulo dawokalimo ebe tabo nanitabonomola, iyo, Godoko iyatawala na a:da: tabo ka:kiyawauta:.

<sup>21</sup> Ebene nale Yelusalemane samamo walo ka:pete, Siliya opo ega:walo Silisiya opamo

---

✧ **1:15:** Ais 49:1; Gal 2:7 ✧ **1:18:** Ali 9:26

gito nemaigiyamo. ☆ 22 Me mabuma: kebe sosi epate Yudiya opono iyaiya duliynomololo dilukulionamiya, ebe Kelisoko nanitabokobi midipiate na ibino balida:mo unamea:no naimano tanalo ebe mabuma:wadenomamo kiyatawaiya. 23 Wiyasiya iba:te epetapino tabo gela kapiya ma kunu olowiya, “Dopamo kebe dubute a nanitabokobi midipi kubaiaema: kawokawo temeteme atamo dikaeamenaki, ebete me tetelo tabo a:kiyawaonako epo bilibilinomate Ya:suko nanitabokobi ka:midima:!” 24 Nanitabola, iba:te ebe tabo olowite naimano tanaloma: Godoko ebo moiya.

## 2

### *Polote Yelusalema Kawo Duliynomololo Ali-bolepi Dubu Epetapiago Daladabutiya*

1 Ebene 14 ulama da:ka:petoi, iyalo ulamalo na Taitasiko lawete Banabasiko ebana Yelusalemamo walo na:ka:timo, ☆ 2 mabu Godote ebena ubi natamo awokalimi nale ebe tanalo kosiyodiloma:. Ebene nale sosi kawokawo watowatopi kapiyago eba naladabutilo, na Wade Tabono tanaloma: kebe iyaiya tabo Yua:piatamo ka:kiyawaonakomo, ebe tanalo iba:tamo ebo awokalilaimo. Nanitabola, nale ebe tanalo nosiyodilimo, mabu na ubia:nola kebe da:ima:te naimano kodakoda woko magumulo Yua:piagodone da:pemaimiya, iba:te ebe da:imi kubakubadopoma: gelama:. 3 Ebene iba:te naimano tabo olowiote, na

---

☆ 1:21: Ali 9:30 ☆ 2:1: Ali 15:2

walubinidawa Taitasikono tanaloma: iba:te nago woki kapiyama: ebo eda:iya, ma kunu ebe Yua:dawama: eba eda:nalo, talena puliyala ebete Yu dubuno tama itamida pukala lawea:noma: eda:lo Godokono woko nago kapimiya kosiyodilonama:. <sup>4</sup> Wiyasiya aimano aladabuti baiamo piyate a:da: elemasigi gabodo da:pelamiya, ibi a:ka:tuwa: ibi nanitabokobi midipi ekakima: eba ka:la:milo ebo geliya, ebete tama itamida pukala nelaemene. Eiye! Ebe dubate kuba woki gabodo ago paladabutiya, a piyate Yua:pi magumulo woko dosiyodilonama: aimano osiyodilo tanalo kubama: kegelama:, ebema: a Ya:su Kelisoko magumulo Mosesekono Totomu Tabono mibomibo magumune da:nemaima:, iba:te ebe tabo olowiote ubi ebo iyatiya Totomu Tabono ala:mo a walo ka:kematuamoema:. ✧ <sup>5</sup> Wiyasiya iba:te Taitasitamo osiyodiloma: degeliya, ale ibino ubi tanalamo tudila:oa:no aimano wokilo tete da:pesolo woki netewama: keda:oa:, iyo, ale la: Yua:pi nanitabokobi midipi mabuma: ibi ebo odiyobolima:, iba:te Wade Tabono nanitabo tanalo kubaimikapoma:.

<sup>6-8</sup> Ebe tetelo aimano taneba magumulo piyate watowatopima: deda:iya, iba:te wiyasiya naimano wokono osiyodilole tanalo bilibilinomo olowiote modoboma: geliya. Iba:te me tanalo iyatawaiya, Godote iyalo tetelo natamo Wade Tabo Yua:piatamo kiyawao woko dikanamiya, dopamo ebete Pitatamo Wade Tabo Yu epatamo kiyawao woko keba kunu kikamiyale eba kunu.

---

✧ **2:4:** Gal 1:7; 5:1,13

Nanitabola, Godote kebe elawamo Pitako Yu epatamo alibodawama: ka:midiyale, ebete ebe atu elawamo na Yua:piatamo alibonedawama: a:ka:midiniya, ebema: ebe watowatopiate naimano woko tanaloma: modoboma: gelate iya gabo idido kosiyodiloma: na kananea: Wiyasiya numa:la:, iba:te naimano woko kubama: negelataleka: nale ebe tanaloma: woki bilibilima: a:keda:na:, mabu me opo epate kebe epo kawokawopima: degelana, Godote ebe dubu unu nikapiamo kulamena: wiyasiya ebete tepo magumamo ulamena. ☆

<sup>9</sup> Ebene Ya:imesiko, Pitako, ega:walo Yoneko iba:te ebe tanebapino umi magumulo kawokawo watowatopima: eba eda:onalo, iba:te naimano wade wokonomo Godogodone pe tanalo diyatawaiya, ebe tetelo iba:te na ega:walo Banabasiko aimano koto uwateuilo ale kapimiya tabo ma kunu gelima:, na Banabasiago woko Yua:pino iyaiya opolo eba osiyodilonalo, ibi wiyasiya woko Yu epono opolo bosiyodilonama:na. <sup>10</sup> Ebene ale kapiya tanalo idi osiyodiloma: iba:te a ebo anaiya, ma kunu Yu epo magumulo piyate nigologolopima: deda:ona, ale Yua:pi nanitabokobi midipi kananalema: iba:te ebe epo nilakapo mani alomo tanalamo kemalagidilolenakoma:, wiyasiya numa:la:, ibino tabo olowia:no nale ebe tanalo osiyodiloma: na a:ka:tuwa: naimano ubi dopamo iyatimo. ☆

*Polote A:ntiyoka Kawo Duliyomololo Pitakono Kuba Osiyodilo Tanaloma: Ebe Kawiya Daniya*

<sup>11</sup> Ebene egela bilibilinomo epetapi da:petoiya, tete idilo Pitate A:ntiyoka kawo duliynomolamo pemaigate kuba tanalo idi Yua:pi nanitabokobi midipi ekakiatamo da:posiyodili, na ebema: sosi epono ololo apulo ebe kawonomamo animo. <sup>12</sup> Iyo, ebete ago da:pokoliyatepi, egela epetapilo ebete Yua:pi ekakiago bae kapimiya kalakalago enaonaki. Wiyasiya Ya:imesite Yu dubu epetapi Yelusalemane dapaliboli, Pitate ebo iyatawi ibi piyate tama itamida pukala lawea:piago pola:nama: talenama: degelana ebe dubula, ebema: ebete ibino ubia: tabo gela tanaloma: eba toletolelo Yua:piago bae nao ebo atepi. ☆ <sup>13</sup> Ebene A:ntiyoka duliynomololo dilukuliona, ebe Yu ekaki epetapi Banabasiko ebana, iba:te Pitakono osiyodilo tanalo umite tola:go atu kuba tanalo ebo kosiyodiliya, iyo, iba:te Yelusalema duliynomolo dubuno ubia: tabo gela tanaloma: toletoleote bae nao magumulo ibino Yua:pi nanitabokobi midipi ekaki gito miyapiya.

<sup>14</sup> Ebema: Wade Tabote ale osiyodiloma: keba kunu kanaenale, iba:te ebe nanitabo tuputupu gabo datepiya, nale ebe tanalo eba umilo ibi bilibilinomono ololo apulo Pitako kawiya ma kunu animo, “A:ma: Yu lumagima: eba eda:nalo, wiyasiya Yelusalema epo pelamea:no a:ma: Yua:pino iyaiya tanalo iba:go kalakalago osiyodilolenakiata. Eiye, me wade osiyodilo tanalola! Ebema: mabu keleka: a:ma: me tetelo ebe wade osiyodilo tanalo atepawete temeteme Yua:piatamo dikalama:wena, ma kunu

---

☆ 2:12: Ali 11:3



iba:te a Yu epono ewonino osiyodilole tanalo waloma:talea:no a:ma:iba:go a:ka:luawitamene?”

*Yu Epo Ega:walo Yua:pi Iba:te Nanitabokobi Midi Tanalo Kapiyado Ibino Igilo Mula: Tanalo Kelaema:na:*

<sup>15</sup> Ebema: a piyate Yu epo magumune dawokalaliyama:, a me tanalo nanitabolo iyatawala, a la: Yua:pi keba kunula:ka: eba kunua:, mabu la:imano epo epetapi bilibilinomate Godokono nanitabo gabo iyatawa:noma: eba eda:onalo kawokawo kuba ebo osiyodilolenaka. <sup>16</sup> Wiyasiya a nanitabokobi midipi bilibilinomate iyatawala, lumagite Ya:su Kelisoko nanitabokobi da:midimene, Godote ebe tanalo kapiyado ebe tuputupudawama: keka:imene, ebete Mosesedo epatamo dikalamiya ebe Totomu Tabamo tuduwata tanalodoa:. Iyo, me mabuma: a Yu epo ega:walo la: Yua:pi, a bilibilinomate Kelisoko nanitabokobi midi gabodo tuputupupima: eba eda:onalo ebo gelanama:, gabo idi kitana: lumagite Godokono Totomu Tabamo tuduwata tanalodo ebeno tuputupudawama: keda:ma:. ☆

<sup>17</sup> Ebema: diyala, daedale wokiagodawate ma kunu da:begemene, “La: nanitabokobi midipiate Kelisoko magumulo Godokono tuputupupima: eda:oma: eba gelalo, wiyasiya la:le Mosesekono Totomu Tabo epetapiamo ka:tudila:wena:. Ebema: numa:la:, Kelisote la: elawokobi midilinata la:le la:imano tudila:oa: tanalodo ele gabo kodida:ema:, kawokawo

---

☆ **2:16:** Ali 15:10-11; Lom 3:20-28; Gal 3:11

kuba osiyodilolepiate keba kunu kodidinake eba kunu!”

Na wiyasiya ebetamo tabo ma kunu kegemamo, “Ao, a:ma: daedale wokilo geata! <sup>18</sup> Godote Mosesedo atamo dikaeamiya, nale ebe iyaiya Totomu Tabo kodakodanomolo walo a:kuwatemo. A:ma: numa:, ebete naimano nanitabokobi midi tanalodo na kebe tanalo kodakodalo laema: kubama: gelo diyatunamiya, nale ebe tanalone olobigate ebene woki iyakobi midite ebe atu tanalo walo da:kelaemo, Godokono umi magumulo na kuba tanalo idi ebetamo kosiyodilomamo.”

<sup>19</sup> Nanitabola, Godokono Totomu Tabono tanalate na niyatunamena, na a:ka:tuwa: naimano elawamo ebene ubi tanalamo tuduwatama: modoboa:. Ebema: na ebe Totomu tanalono elawo magumune nemaigate naimano elawamo osiyodilo tanaloma: gito a:iyamo, nale ebe tetene wagilimite Godokono elawamo ebene tanaloma: kokolinama:. <sup>20</sup> Iyo, me gabodo nale Kelisago kewa olotolowalo gito a:iyamo, ebema: me tetelo Kelisote na magumulo eba okolinalo na a:ka:tuwa: naimano elawamo walo a:kokolinamo. Nanitabola, Godokono Gudute na nilakapolo eba malagidilonenalo ebene igilo na mabuma: iyabaiamo diyatiya, ebema: na me tetelo ebe nanitabokobi midi tanalodo bokolinamo. ☆ <sup>21</sup> Eiyee! Lumagite Totomu Tabamo tuduwata tanalodo tuputupudawama: eda:ma: gabote nanitabolo nitanataleka:, a biyatawaona: Kelisokono a:e tanalo ebe kawo tanaloo:. Wiyasiya numa:la:, Totomu Tabamo

---

☆ 2:20: Gal 1:4

tuduwata tanalodo gabo kitana;, ebema: Godote ebenu nilakapo gabo idi na diyatunamiya, nale ebe wade gabonomo ubia:noma: a:keda:namo.

### 3

#### *Godote Epono Nanitabokobi Midi Tanalodo Ibi Tuputupupima: Da:midilina*

<sup>1</sup> O Galesiya opo epala;, mabu keleka: la: daedale epoma: deda:ima? Eiye, Ya:sute kewa olotolowalo da:iya, na dopamo ebe tanalono magumu la:tamo wadenomamo awokalimo! Ebema: la:godolo dopamo da:pola:namiya, Saitanakono osiyodilo tanalodo ebe wadewade woki potele kiyalekelametiya? Numa:la;, la:le ebenu iyaiya a:da: elemasigi tanalo uwata:wete kuba woki ma kunu malagidilo owagilimata, Godote Mosesedo epatamo dikalamiya la:le ebe Totomu Tabamo tudila:o tanalodo tuputupupima: keda:wenama: <sup>2</sup> Ebema: modobola la: me kapiya tanalo na nanana:la;, la:le Godokono Uliyanano elawo kebe gabodo kelawa:ima, ebenu Totomu Tabamo tudila:o gabodola:ka;, o la: ebenu Wade Tabo olowi tetelo nanitabokobi da:mida:ima ebe tanalodola:ka? <sup>3</sup> Eiye, la: daedale epoma: akoeda:oala;! Godokono Uliyanate la: magumulo kebe woko kowagilimile, la: modobola:ka: ebenu elawo tanalone olobila:wete la: a:ka:tuwa: la:imano osiyodilole elawamo ebe woko opoliyama? <sup>4</sup> Numa:la;, la:imano nanitabokobi midi magumulo kebe tanalo bilibilinomate la:tamo da:pemaimionakiya, Godote ebe tanalodo la: wadenomamo iyatulamenakiata, a, nanitabola:ka? Eiye,

modoboa: la: ebe wadewade woki gito dodolomatilima!<sup>5</sup> Ebema: Godote ebenu Uliyanano elawo la:tamo kawonomamo eba ikalamenalo la: magumulo kawokawo anoano tanalo dosiyodilolenako, ebe tanalote la:godolo beda: mabuma: kitanale? La: Godokono Totomu Tabamo tudila:o mabuma:la:ka:, o la: ebenu Wade Tabo olowi tetelo nanitabokobi da:mida:ima ebe mabuma:la:ka:?

<sup>6</sup> Ebema: modobola la: A:ibalayamakono tanalo nemalagidilala:. Godokono Bukalo tabote ma kunu itana, “Godote ebenu nanitabokobi midi tanalo umite ebe tuputupudawama: ebo ka:miya.” ✧ <sup>7</sup> Iyo, me Buka tabone modobola la: me tanalo wadenomamo niyatawala:, piyate nanitabokobi midipima: deda:ona ibi ebe A:ibalayamakono walone gudinomola. <sup>8</sup> Numa:la:, Godote a tetelo Yua:pi uwatete ibino nanitabokobi midi tanalodo ibi tuputupupima: da:midilina, ebe tanalote maiga:no dopamo ebete A:ibalayamatamo ebe nopo eba awokalimilo Kelisokono Wade Tabono magumu ebetamo ebo kiyawaiya. Iyo, ebe tabote ebenu Bukalo ma kunu itana, “Iyaiya opolo dilukuliona ebe epo taneba bilibilinomate na ma kunu ba:toweonamenakoma:na:, ‘A:ma:le A:ibalayamako keba kunu kowaluba:wenakiya, modobola a:ma:le atumu a eba kunu nowalubinakiye.’” <sup>9</sup> Nanitabola, A:ibalayamate Godokono tabo olowite nanitabokobi da:midiya, ebe tetene wagilimite Godote ebenu okoli magumulo ebe wadenomamo walubinaki, ebema: me tetelo piyate Godoko atumu

---

✧ 3:6: W Mabu 12:3; Lom 4:3,16

nanitabokobi da:midina, ebete ibi eba kunu atumu a:kowalubilinako.

10 Wiyasiya numa:la;, piyate Totomu Tabamo tudila:oma: ibi a:ka:tuwa: ibino elawo nanitabokobi da:midilina, Godote ibi walubilia:no iba:te ibino kuba osiyodilole mabuma:kawo temeteme biyataawaonakoma:na:. Iyo, ebenu Bukalo tabote ibino tanaloma: ma kunu itana, “Totomu Tabono iyaiya tanalo bilibilinomo magumulo potele kapiya totomu kapiya tetenomolo dadikanalemene, ebe mabuma: ebete ebenu a:e uwomuamo olopoligoa: temeteme ma kunu biyatawanakomene, ebenu kuba wiyate Godogodone nanitabonomolo ka:pemene!” ✧ 11 Ebema: numa:la;, a opo epo bilibilinomagodolo lumagi idite modoboa:noma: eda:na Godokono Totomu Tabo bilibilinomamo ka:tuduwatama:, iyo, ebe tanalone a iyatawala, Totomu Tabamo tuduwata tanalodo Godote lumagi idi ebenu tuputupudawama: a:ka:midimene. Nanitabola, ebe gabo kitana:, wiyasiya kalakala kawonomola, Godokono Bukalo tabo idite ma kunu gena, “Piyate Godokono tuputupupima: deda:ona, iba:te ebe nanitabokobi midi tanalodo nanitabo igilo kelaema:na:.” ✧ 12 Ega:walo ebenu Bukalo tabo idite ma kunu kegena, “Piyate ebenu iyaiya Totomu Tabo bilibilinomamo eba tudila:onalo idi kapiya adikanalea:no, me opo epo magumulo ibinomate nanitabo igilago bilukulinama:na:,” wiyasiya nale dopamo ma kunu gemo, ebako lumagite me opolo kokolina:. Ebema: me tanalo

---

✧ 3:10: Totomu 27:26 ✧ 3:11: Gal 2:16

kawo tanalonomola, Godote ebeno Bukalo a niyatuamena, Totomu Tabamo tuduwata tanalo ega:walo nanitabokobi midi tanalo, ebe netewa tanalate iyaiya ba:pola:na, ibi kapiya:.

<sup>13</sup> Ebema: nanitabola, ale Godokono Totomu Tabo adikanale mabuma: ebete a temeteme magumulo kilukulinama: degiya, wiyasiya Kelisote a nilakapoiamele ebe temeteme uwateamete ebo a:iya. Iyo, me gabodo ebete aimano kuba osiyodilole tanalono temeteme magumune a iyalo owagaiya. Numa:la:, Kelisokono a:e tanalono magumu kawokalima: Godokono Bukalo tabo idite ma kunu gena, “Epate lumagi idi anakapuima: ebeno ape kewamo diyatima:na:, ebe lumagite ebeno kuba osiyodilole mabuma: Godokono ololo apulo olopoligoa: temeteme belawenakomene.”\* ✧

<sup>14</sup> Me mabuma: Ya:su Kelisote kewa olotolowalo da:iya, ebete ebeno ubi ebo iyatiya, ebeno a:e tanalodo aimano kuba osiyodilole tanalono temeteme wiya kuwateaema:, ega:walo ebe ubila ebeno Uliyanate aimano nanitabokobi midi tanalodo a magumulo kokolinama: Iyo, Godote Yu epo kowalubilima: dopamo nanitabonomolo egiya, wiyasiya ebete Kelisokono a:e tanalodo Yua:piatamo gigiyu atumu a:ka:iyamidiya, ibino ilukuli magumulo

---

\* **3:13:** Buka ka:la:mioledawa, modobola a:ma: me tanalo niy-atawa, Ya:suko tuputupudawanomola, ebete kuba idi kosiyodilon-akia: Wiyasiya ebete kewa olotolowalo aimano kuba osiyodilole tanalo bilibilinomo uwateamete, ebene uwomua: tetelo ebe kuba tanalate ebegodolo eba pola:nalo ebete a mabuma: ebe kuba ebeno kalimamo ba:mula:leamenamene. ✧ **3:13:** Lom 8:3; Totomu 21:23

Godote ibi wadenomamo kowalubilinakoma; ebete dopamo A:ibalayamako keba kunu kowalubinakile eba kunu.

*Godote Dopamo A:ibalayamatamo Kebe Tabo Nanitabolo Degiya Ebe Tabono Elawo Ebena Iyaiya Totomu Tabono Elawote Kadikamidaliya:*

<sup>15</sup> Naimano nanitabokobi midipi ekakiala; nale me opo epono osiyodilo tanalo idi uli taboma: midite ebe tanalamo la: kiyatulaemamota. Ma kunu epono ololo apulo netewa dubate ibino nopo iyatite bae kapimiya denaoma:na; walone tetelo ibi magumulo idite ebe nopono tabo gito adikanalema: modoboa; iyo, iba:godolo gabote a:kitanamene ebe tabo iyakobi ka:midima: <sup>16</sup> Eba kunu Godote ebena Bukalo iyaiya tete epetapilo ebena nopo A:ibalayamatamo eba iyatilo tabo nanitabolo ebo genaki, ebete ebe ega:walo ebena walonepi kowalubilinakoma; wiyasiya numa:la; ebe tabono tanalate A:ibalayamakono walonepi bilibilinomono tanaloma: unulo eba pola:nalo, ibino kawo magumu ebe walonedawa kapiyanomono tanaloma: gena, ebe dawa ebe Kelisotela. ✧

<sup>17</sup> Ebema: naimano kawo iyatulame tanalo ma kunula. Dopamo tetelo Godote ebena nopo eba iyatilo keba tabo nanitabolo degiya, ebe tabono elawote uwomua: tetelo a:kolopoligonamene. Iyo, 430 ulama epetapi da:petoiya, ebe tetelo Godote ebena Totomu Tabo epatamo dikalamiya, ebe Totomu Tabono elawote modoboa:noma: ediya ebena dopo

---

✧ **3:16:** W Mabu 12:9

tabono elawo kadikamidalema: ☆ 18 Ebema: numa:la; Godokono wadewade walubi tanalate Totomu Tabamo tudila:o tanalodo epatamo nemaimiotaleka; a biyatawaona: ebete dopamo nanitabolo degiya ebe dopo tabono elawote iyalo olopoligiya. Wiyasiya eba kunua: Godote A:ibalayamatamo nanitabolo degiya, ebe nani tabo kapiyado wadewade walubi tanalo ebetamo gito ikameonaki, A:ibalayamakono osiyodilo tanalo ididoa: Me mabuma: a iyatawala, ebe nani tabono elawote uwomua: tetelo eba itanalo, me tetelo a mabuma: atumu wade woko ebe kosiyodilona. ☆

*Godokono Totomu Tabono Woko Osiyodilo Tanalo*

19 Ebema: mabu keleka: A:ibalayamakono walogabo apune Godote Totomu Tabono iyaiya tanalo epatamo dikalamiya? Nanitabola, Godote ebe osiyodilo tanalodo ubi iyatiya, me opo epate aimano kuba osiyodilole tanalo wadenomamo kiyatawaoma: A:ibalayamakono walone gudu idino pe teta:mo. Numa:la; ebe walone gudu ebe Godote pokono tanaloma: tabo A:ibalayamatamo nanitabolo degiya ebe gudula, iyo, ebe Kelisotela.

Ega:walo me tanalo idila. Dopamo tetelo Mosesete Godoko ega:walo me opo epo tetenomolo eba utinalo, Unu Duliyomolono nopopiate Godokono Totomu Tabono iyaiya tanalo ebetamo ebo ikameiya, ebete ebe Totomu Tabono nopo ibi wadenomamo kiyatulaema: ☆

20 Wiyasiya walone tetelo kebe oli nopote atamo

---

☆ 3:17: Maimi 12:40 ☆ 3:18: Lom 4:14 ☆ 3:19: Lom 5:20; Ali 7:38



Kelisogodone ka:pemaigiyale, ebe nopono tanalo iyanomola mabu Kelisoko ega:walo Godoko ibi kapiyanomola. Ebema: numa:la:, opo lumagi idite Godoko ega:walo a tetenomolo utia:no, ebe tetelo ebe a:ka:tuwa: me opamo piya ebena nopo a ka:piyatuaema:. <sup>21</sup> Ebema: la:imano woki keba kunula:ka:? Godokono Totomu Tabono nopote Mosesedo da:pemaigiya ega:walo Godokono nani Tabonomo Ge Tanalono nopote Kelisogodone da:pemaigiya, ebe netewa nopo magumulo gowela tanalo ba:kitanale? Ao, kitana! Gabote nitaniyataleka: ale totomu tabo ida:mo tudila:o tanalodo nanitabo igilo kelaema:, Godote a ebe gabodo tuputupupima: eba midinalo ebena nopo idi atamo a:kikaeamiyana:. ✧ <sup>22</sup> Wiyasiya ebena Bukalo ebete a niyatuaema:, me opo epo bilibilinomate kuba osiyodilole tanalono elawo magumulo ilukulina, iba:te nanitabo igilo laema: ka:modobona:. Me mabuma: epate ibino osiyodilole tanalono elawo nanitabokobi midia:no Ya:su Kelisoko kapiya nanitabokobi da:midina, Godote ebe tanalodo kebe walubi tanalo iba:tamo ikalaema: dopamo nanitabolo degiya, ebe tanalote iba:tamo nanitabonomolo ka:pemaigamene.

<sup>23</sup> Nanitabola, Godote ebena Nanitabokobi Midi Tanalono nopo awokalimia:no, dopamo tete geyageyanomolo nanitabokobi midi tanalono pe teta:mo a opo epate ebena Totomu Tabono elawo magumulo ilukulinaima:, kuba osiyodilolepiate gabamanino idoko motolo keba kunu kilukuline eba kunu. ✧ <sup>24</sup> Iyo, Godote ebena To-

---

✧ **3:21:** Lom 8:2-4 ✧ **3:23:** Gal 4:3

tomu Tabo atamo dikaeamoiya, ebena ubi ma kunu iyatiya, ale ebe tabono elawo magumulo eba ilukulinalo ebe tabono iyaiya tanalate Kelisokono pe teta:mo a wadenomamo iyatuame-napete, ebene ale ebegodone ebena oli nopo idi dolowioma: ebe nanitabokobi midi tanalodo ebena tuputupupima: ebo keda:omalema: ☆

<sup>25</sup> Ebema: kalakala kawonomola, a me tetelo Totomu Tabono elawo magumulo kilukulina:, iyo, ebe tanalono elawote agodone iyalo olopoligiya, nanitabokobi midi tanalote da:pemaigiya ebe tetelo.

<sup>26</sup> Numa:la:, Ya:su Kelisoko magumulo la: bilibilinomate ebe nanitabokobi eba midinalo Godokono gudima: beda:onamata. ☆ <sup>27</sup> Iyo, la:le obamo waduba:midaole tanalo Kelisoko magumulo elawimata, ebema: me tetelo la: ebena oli okoli tanalago wapata:lamenamata, lumagite oli kaliku pulite kalakalago keba kunu kepata:nakole eba kunu. ☆ <sup>28</sup> Ebema: nanitabola, la: Ya:su Kelisoko magumulo eba ilukulinalo, la: piyate Yu epoma: deda:wenama ega:walo la: piyate Yua:pima: deda:wenama, la: piyate epetapino wiya: woko dosiyodilawenama ega:walo piyate la: a:ka:tuwa: la: kowalubila:ema: mani woko dosiyodilawenama, la: piyate dubuma: deda:wenama ega:walo la: piyate kamiyalema: deda:wenama, Godokono umi magumulo la: bilibilinomo kapiya eponomolata, la: iyaiya epoma: keda:wena:. ☆ <sup>29</sup> Iyo, la: bilibilinomo Kelisokono epolata, ebema: la: A:ibalayamakono nani walone gudima:

☆ 3:24: Lom 10:4 ☆ 3:26: Yon 1:12 ☆ 3:27: Lom 6:3

☆ 3:28: Lom 10:12

eba eda:onalo, Godote ebetamo uwomua: walubi tanalo ikameoma: nanitabolo degiya, la: atumu Godogodone atu walubi tanalo ba:kelawenakomata. ✧

## 4

### *Godokono Nani Gudino Tanalo*

<sup>1-2</sup> Ebema: nale uli tabo idi ma kunu gemo. Kawo dubu idino moto epo magumulo ebenu nani gudu ega:walo wiya: wokopi iba:te kapimiya ilukulina. Nanitabola, walone tetelo ebe gudute ebenu nabiwigodone inamabu bilibilinomo ega:walo elawo kuwatemene, wiyasiya ebenu nabiwite ebenu tanaloma: kebe tete modoboma: kegiyale, ebete ebe kawo teta:mo maiga:no dopamo ebe a:ka:tuwa: ebenu ubilo tanalo idi kosiyodilona:. Iyo, ebete da:pesoma: eba eda:nalo, ebenu nabiwite piyatamo elawo dikalamiya iba:te ebenu dawalipima: ega:walo iyatulamepima: keda:onama:, ebete ebe kawokawopino tabamo gito tuduwatanako, ebenu nabiwino wiya: wokopiate ibino woko namutupiatamo keba kunu ka:tudila:onake eba kunu. <sup>3</sup> Ebema: a atumu, kuba uliyana magumulo piyate me opolo ega:walo tobolo unulo kawokawopima: deda:ona, a dopamo ibino elawo magumulo ilukulinaima: aimano tepo magumuno iyatawa tanalote kawoma: eda: teta:mo. ✧ <sup>4</sup> Ebene ebe tetenomote Godokono ubilo modobonomolo da:pemaigiya, ebete ebenu Gudu me opamo ebo palibiya, iyo, ebete kamiyale idino tepo magumune awokalate a opo epago

Godokono Totomu Tabono elawo magumulo okolinami. ☆ <sup>5</sup> Numa:la:, ebete eba kunu osiyodiliya, a piyate eba:go Totomu Tabono elawo magumulo dilukulinaima:, ebete a ebe elawo magumune eba wagailo ale Godokono nani gudima: ebo keda:omalema:.

<sup>6</sup> Ebema: kalakala kawonomola, mabu a nanitabokobi midipiate me tetelo Godokono gudima: deda:onama:, ebete ebeno Guduno Uliyana atamo ebema: palibiya ebete aimano tepo magumulo ka:pokolinama:. Numa:la:, ebe Uliyanate ado Godoko Abama: eba ka:minalo ebe da:toweomenako ebe dawala. ☆ <sup>7</sup> Ebema: nanitabokobi mididawa, a:ma: dopamo Totomu Tabono wiya: wokodawama: eba eda:nalo kebe temeteme magumulo dokoliawenamiya, a:ma: ebe temeteme magumune iyalo nemaigawete me tetelo wiya: wokodawama: walo keda:wena:, a:ma: wiyasiya Godokono nani guduma: eda:nata. Ega:walo me tanalo idila. A:ma:le ebeno guduma: deda:wena, ebema: Godote ebeno gudi mabuma: kebe wadewade tanalo iyalo dogodogokobi da:midiliya, ebe iyaiya walubi tanalo ebete a:ma:tamo uwomua: tetelo gito bikameonakoma:ta.

*Polote Galesiya Sosi Epono Tanaloma: Woki Bilibili Tanalo Dawokalimiya*

<sup>8</sup> Numa:la:, dopamo la: Godokono nanitabo tanalo iyatawa:noma: eba eda:onalo, epetapiate kebe kubakuba uliyana kamamalatelene la: ebe uliyanano temeteme ikalame tanalono

---

☆ **4:4:** Yon 1:14; Lom 1:3    ☆ **4:6:** Lom 8:15-17

elawo magumulo atumu nilukulinaimata.  
<sup>9</sup> Wiyasiya me tetelo la: Godokono nanitabo tanalo uimata, ebete iyalo tetelo la:imano tanalo nanitabolo dulamelelametiyala ebe dawala. Ebema: la: ebe nanidawama: eba gelanalo, mabu keleka: la: ubi diyata:wenama, la:le dopamo kebe kubakuba uliyanano temeteme magumulo kilukuliawenaima la: ebe atu uliyanano tanalamo walo ka:kolobila:ema:? Eiyeye, ebe uliyanate nigologolopimu ilukuliona, iyo, ibino elawo nanitabolo kitana: la: kowalubilitama! Ebema: la: ubi beda: mabuma: kiyata:wenama ibino elawo magumulo walo ka:kilukuliawenama:? <sup>10</sup> Eiyeye! La:imano wokiate kubakubaote, ebene Yu epono osiyodilole magumulo iba:te kawokawonomoma: degelana, ebe iyaiya egelano tanalo, ega:walo oli saganano tanalo, ega:walo kawokawo soliyomuno tanalo, ega:walo ulama epetapino kawokawo osiyodilole tanalo, la: atumu ebe tanalo kawokawonomoma: gelanamata! ✧ <sup>11</sup> Ebe mabuma: nale la:imano nanitabokobi midi tanaloma: woki bilibilima: editamo. Nale la: magumulo kebe woko kodakodalo kosiyodilimo, diyala, ebe wokono da:ima:te iyalo a:kubakubaiya!

<sup>12</sup> Ebema: naimano nanitabokobi midipi ekakiala:, nale la: toweolaemata, nale dopamo la:go kapiyama: keba kunu ka:pedimo, modobola la: eba kunu nago kapiyama: eda:wete na nibaminatena:la:. Iyo, dopamo la:le temeteme natamo kikanama:wenakia:, ebema: la: niyaniyata, me tetelo temeteme natamo

---

✧ **4:10:** Lom 14:5; Kol 2:16

ikanaema: akowagilima:la: <sup>13</sup> Nanitabola, natamo dopamo demaigi, la: ebe tanalo iyatawalata, ma kunu gabugabute na dunamiti, na ebe tanalodo wade tete umite Godokono Wade Tabo la:tamo ebo kiyawaimo. <sup>14</sup> Ebe tetelo naimano gabugabuno tanaloma: la: na eba walubinilo mibo tanalote la:tamo emaiigi, wiyasiya la:le na malogonea:no, la:imano tepo magumuno wokilo la:le na Godokono Unu Duliyomolono nopodawa idi keba kunula:ka: eba kunu da:midina:ima, naimano tabo kiyawao tanalo ubia:noma: keda:wea:, iyo, la:le na Ya:su Kelisoma: midina:wete na kalakalago ebema: lawenimata. <sup>15</sup> Numa:la:, ebe tetelo la:godolo na mabuma: ditanati, ebe kalakala beda: kawonomola:ka:! Ebema: beda: tanalote kemaigile la:imano kalakala ebo kanakapuima:? Nanitabola, dopamo la:le na mabuma: ubi ma kunu iyatimata, gabote nitanataleka: la: magumulo idite ebene wadewade balidi magobelete natamo gito bikanamena:. <sup>16</sup> Wiyasiya numa:la:, nale me tetelo Godokono nanitabo tanalo la:tamo walo dakawokaliminamo, ebe mabuma: la: epetapi la:imano wokilo na nilakapoinamea:no la:le na la:imano goweladawama: midininamata!

<sup>17</sup> Nanitabola, piyate Godokono mailamo a:da: tabo da:kiyawaonaka, iba:te la:imano tanaloma: ibino ubi kawonomamo ma kunu iyatina, iba:te la:imano woki kubailamete, la: ega:walo na, a iyaiya kalomoema:, ebene la: ibino tanebapima: eba eda:olo la:imano ubi iba:tamo atumu kawonomamo ebo kalomomamota. <sup>18</sup> Ebema: numa:la:, lumagi

idite la: nanitabo gabodo kowalubilitama: ebena ubi kawonomamo diyatimene, ebe tanalo wadenonomola. Iyo, nale la:godolo luta tetelo ega:walo nale luta: tetelo, la:le ebako wade iyatulamedawatamo ubi diyata:ema, kuba:nola, naimano kalakalate ebema: kitanamene!<sup>19</sup> Wiyasiya la: idawano gudia:, la: naimano wadewade nanitabokobi midipi gudinomolata, ebema: nale la: mabuma: diyatawitamo, ebe temeteme tanalo ebe kamiyalete gudu alaima: temeteme diyatawanako eba kunula! Nanitabola, ebe temeteme tanalote nagodolo kitanamene la:le la:imano nanitabokobi midi magumulo Kelisoko keba kunula:ka: ebako epoma: deda:ema ebe teta:mo,<sup>20</sup> ebema: numa:la:, la: mabuma: nagodolo ditana ebe woki bilibili tanalo da:pesoa. Me mabuma: nale naimano ubi tanalo kawonomamo ma kunu iyatitamo, gabote ditanamene nale me tetelo pete la:go kapimiya ilukulite Godokono nani tabono tanalamo la: diyatulametama, ebe atu tetelo naimano nilakapo awokalimi tanalamo la: kowalubilimamota!

*A:igako Ega:walo Selako Ibino Uli Tabono Magumu Tanalo*

<sup>21</sup> Ebema: la: piyate Godokono Totomu Tabono elawo magumulo walo ilukulima: ubi diyata:wenama, la: me tanalo na nanana:la:. Mosesete Godokono Buka magumamo kebe Totomu Tabo kakuloliyale, la: modobola:ka: ebe Totomu Tabono kawo magumunomo nanitabonomolo laema?<sup>22-23</sup> Numa:la:, Godokono Bukalo tabote me tanalo awokalimina,

A:ibalayamate dubu gudi netewa ulamiya, dopo gudute ebenu wiya: wokodawa kamiya legodone awokalate, idite ebenu nani kamiya legodone akawokaliya. Ebene dopo gudute epono kateneno ubi tanalodo eba awokalalo, gudu idite wiyasiya Godokono anoano tanalodo awokaliya, mabu dopamo ebete A:ibalayamatamo tabo nanitabolo egiya ebenu kamiya lete ebe gudu kalaimene. ✧

<sup>24</sup> Numa:la:, ebe kamiya le netewano tanalo ebe a iyatuaema: uli taboma: eda:na, ega:walo me tanalono magumu ebe ma kunula. Netewa kamiya le ebe Godote iyaiya nopo epatamo dawokalilamiya ebe netewa tanalo keba kunula:ka: eba kunula. Dopo kamiya le A:igate wiya: wokodawama: deda:nami, ebema: ebete kebe gudi kalailamiya le ebe gudi ebe atumu wiya: wokopima: keda:iya. Ebe mabuma: A:igako ebe Godote Sainai Ununomo Damelalo dawokalimiya ebe Totomu Tabamo tudila:o tanalono nopo keba kunula:ka: eba kunula, iyo, piyate ebe nopono elawo magumulo dilukuliona ibi wiya: wokopila, iba:te woko osiyodilo magumulo kawokawo temeteme kapiya biyatawaonakoma:na:.

<sup>25</sup> Ega:walo a iyatawala Sainai Damelate Ala:biya opolo itana, ebema: ebe damela ebe ulila, ebe Yelusalema kawo duliya molola, mabu me tetelo Yelusalemalo dilukuliona ebe Yu epo bilibinomate Godokono Totomu Tabono elawo magumulo eba ilukulinalo wiya: wokopima: eda:ona.

<sup>26</sup> Wiyasiya Godokono Unu Duliya mololo



ditana ebe oli Yelusalema duliynomolono tanalo iyanomola. Ebe duliynomolo ebe A:ibalayamakono nani kamiyale Selako keba kunula:ka: eba kunula, iyo, ebe a nanitabokobi midipino menokola, ebema: piyate nanitabokobi midi magumulo dilukuliona iba:te ibino temeteme woko magumune iyalo maimiote, me tetelo woko osiyodilo magumulo tutupima: eba eda:olo wiya: temeteme woko walo a:kosiyodilonama:na:.

✧ 27 Numa:la:,

Selate tete geyageyanomolo gudiana: eba eda:nalo, Godote keba nani tabo ebena awi A:ibalayamatamo dopamo degiya, ebete ebe tabo malagidilolo Selako ebo walubiya Aisa:keko kalaima:. Ebe mabuma: Godokono Bukalo tabo idite ma kunu gena,

“Ta:li kamiyale, modobola a:ma: nekalakala!

Iyo, a:ma: dopamo gudu alaimia:noma: deda:wenamiya,

a:imano tabo madodo unamo adipatelo

kalakala kawonomamo nawokalima:!

Nanitabola, epate poka kuba ta:li kamiyalema: degelanamiya,

ebe kamiyaletete gudi bilibilinomo kulaemene, ebene ebena gudino uwomute

dopamo daidiya ebe kamiyaleno gudino uwomu ka:nodolimene.” ✧

28 Ebema: naimano nanitabokobi midipi ekakiala:, la: Godokono gudilata mabu ebete iyalo tetelo la: walubilima: nanitabonomolo degiya, la: ebe tabono elawo magumudo awokalaimata, Aisa:kete dopamo ebena nani tabono tanalodo

✧ 4:26: Yu Epo 12:22; Awo 21:2,10 ✧ 4:27: Ais 54:1

keba kunu kawokaliyale eba kunu. ☆

<sup>29</sup> Nanitabola, A:ibalayamako tetelo ebenu gudi magumulo potele epono kateneno ubi tanalodo dawokaliya, ebe dopo gudute ebenu ekawitamo kawokawo temeteme ikamenaki mabu ebe iyatawala, ekawite Godokono Uliyanano anoano walubi tanalodo awokaliya. Numa:la:, me tetelo atu tanalote walo na:kemaigana, Totomu Tabono elawo magumulo wiya: wokopima: deda:ona, iba:te kawokawo temeteme a tutupima: eda:opiatamo ikaeamenaka. ☆

<sup>30</sup> Ebe mabuma: Godokono Bukalo tabote a keba kunu kiyatuamenale? Iyo, Godote A:ibalayamako ma kunu aniya, “Modobola, a:ma: wiya: wokodawa kamiyale ebenu gudago la:godone iyabaiamo nalibola: Nanitabola, a:ma:le a:imano nani kamiyalegodolo duma:wia, ebe nani gudunomago a:imano dopo gudute a:imano dogodogo inamabu magumulo kapiya apu idi a:kelaemene, ao, ebe dogodogo inamabuate a:imano nani gudu kapiyagodolo na:pola:namene!”

<sup>31</sup> Ebema: naimano nanitabokobi midipi ekakiala:, wiya: woko temetema:go dosiyodilona a ebe kamiyaleno gudi keba kunula:ka: eba kunua:. Ao, a nanitabokobi midi magumulo tutupima: eda:onama:, ebema: a nani kamiyaleno gudila ega:walo ale aimano Nabiwigodone wadewade walubi tanalo buwatanakoma:.

## 5

### *Kelisoko Magumulo Tutupima: Deda:ona Iba:te*

*Totomu Tabono Elawo Magumulo Walo Ilukulinama: Modoboa:*

<sup>1</sup> La: numa:la:, Kelisote kewa olotolowalo a tutupima: a:midiya ale ebenu tutu okoli magumulo nanitabonomolo kilukulinama:, ebema: modobola la: ebe tutu okoli magumulo kodakodalo eba lamota:onalu lumagi idino wiya: temeteme woko tanalono gubi magumamo walo akonopila:oala.

<sup>2</sup> Naimano tabo wadenomamo nolowiala:. Na Polote me tanalo la: Yua:pi dubu analemata, la: lumagi idino kuba wokiamo tudila:wete Yu epono tama itamida pukala la:imano apa:mo delawa:ema, ebe tanalodo la:le la:imano woki ma kunu kawokalimamota, Kelisote la: mabuma: dosiyodiliya la: ebe tanalo dologala inamabuma: eba midinalo iyabaiamo ba:idiloma: wagenamata.

<sup>3</sup> Ebema: nale la: kapiya tete ida:mo kawiya walo nakanalemata, la: magumulo dubu idite Yu epono tama itamida pukala delaemene, ebe tetene wagilimite ebete Totomu Tabo epetapino tanalo bilibilinomamo na:tuduwatanakomene ebenu kuba wiyate ebetamo pekapoma:!  
<sup>4</sup> Eiye! La: piyate Godokono Totomu Tabamo tudila:o tanalodo ebenu tuputupupima: eda:oma: dowagela:wenama, la: a:ka:tuwa: la: Kelisogodone iyalo iyailimata, iyo, la: Godokono nilakapolo gito ikaeame tanalune olobila:iyamata.

<sup>5</sup> A nanitabokobi midipiate wiyasiya olowiolo nemakopelena:, Godote aimano nanitabokobi midi tanalodo woko eba osiyodilonalo ebe a:ka:tuwa: ebenu Uliyanano elawamo a ebenu nani tuputupupima: ka:midimene.  
<sup>6</sup> Ebema: nanitabola, a Ya:su

Kelisoko magumulo eba ilukulinalo, ale Yu epono tama itamida pukala iyalo delawiyama: ebe kawo tanaloo; ega:walo ale lawea:pima: deda:onama: ebe tanalo atumu kawo tanaloma: keda:na: Numa:la:, kapiya tanalonomote kawoma: eda:na, ebe tanalo ebe aimano nanitabokobi midi tanalote aimano nilakapo awokalimi tanalodo woko dosiyodilona ebe tanalola. ✧

<sup>7</sup> Eiyee! La: dopamo la:imano nanitabokobi midi gabodo elawonomamo tolaimata, sukuu gudino kalakala egelalo iba:te keba kunu ka:pui:la:onake eba kunu. Ebema: la:imano agowa ukamidadawama: potele kedile? Iyo, la:le dopamo Godokono nanitabo tanalo olowiawete ebe tanalamo tudila:o dowagilima:ima, ebe tanalo pokono osiyodilo tanalodo katepaima? <sup>8</sup> Numa:la:, Godoko la:imano agowa ukamidadawa:, ao, ebe dopamo la: nanitabokobi midi tanalamo deka:la:mitia ebe dawala.

<sup>9</sup> Ega:walo me tanalo idila. Epate ma kunu gelana, “Palowa bae kokalima: kamiyalete gamagamaimino tuwae inamabu kelenomo palowago dekapiyailaemene, baete a:ka:tuwa: ebo kegagamagamene.” Ebema: numa:la:, eba kunu la:imano taneba magumulo kuba woki da:pesonomote ditana, ebe a:ka:tuwa: kawoma: ebo keda:mene. ✧ <sup>10</sup> Wiyasiya kalakala kawonomola, la:la, nala, a bilibilinomate Kawodawa magumulo kapiyama: eba eda:onalo na me tanalo nanitabokobi na:midinamo, na me tetelo la: walo dakanaletama la: me

✧ **5:6:** 1Kol 7:19; Gal 6:15    ✧ **5:9:** 1Kol 5:6

tabono tanalone a:kolobila:ema. Ebe mabuma: potele woki bilibili tanalo la:tamo ikalaema: dowagelena, na ebe lumagino tanalo iyatawa:, wiyasiya Godote ebena tanalo eba iyatawalo kuba wiya ebetamo nanitabonomolo kikaemene!

✧

<sup>11</sup> Ebema: naimano nanitabokobi midipi ekakiala:, numa:la:. Nale Wade Tabo kiyawao magumulo nanitabokobi midipi dubate Yu epono tama itamida pukala laema: ibi nanaletaleka:, Yu epo magumulo idite natamo temeteme a:kikanamena:. Nanitabola, dopamo nale ebe tanalo kawo tanalomoma: genakimo, wiyasiya nale me tetelo Kelisote kewa olotolowalo da:iya ebe tanalono magumu kapiya awokalimilo tabo ebo kiyawaonakomo, iyo, me mabuma: epetapiate natamo dowate kawokawo temeteme gito ikanamenaka. <sup>12</sup> Eiye! Ibi piyate tama itamida pukala lawe tanaloma: la:tamo woki bilibili tanalo dikalametana ebe dubula, ebema: nale ibi mabuma: naimano ubi ma kunu iyatinamo, modobola iba:te la:tamo tanalo idi osiyodiloa:no wiyasiya ibi a:ka:tuwa: ibino tama kubanomamo eba iyaililo ibino gudi osiyodilole gabote nolopoligadigamene!

*Godokono Uliyanano Elawamo Ilukuli Tanalo*

<sup>13</sup> Naimano nanitabokobi midipi ekakiala:, nanitabola, Godote la: ebena tutu okoli tanalamo eka:la:miata. Wiyasiya la: nanisiwale, ebena tutu okoli tanalo magumulo eba ilukulinalo, ebe tanalone la:le la:imano kateneno kuba ubi tanalamo tudila:oma: modoboma: akogelala:.

✧ **5:10:** Gal 1:7; 2Kol 11:15

Modobola la: wiyasiya la: magumulo epetapiate epetapi nilakapolo eba malagidilolenalo nowalubiinakiyala; wiya: wokopiate ibino woko namutupiatamo woko keba kunu kosiyodilone eba kunu. ☆ 14 Nanitabola, Godokono Totomu Tabo bilibilinomo magumulo kebe totomute kawonomoma: keda:nale, me totomu ebe “A:ma: a:ka:tuwa: a:ma: demalagidilawena, eba kunu a:ma: tatalilo dokolina, modobola a:ma:le ebe lumagi nilakapolo nemalagidilona.” Iyo, potele me kapiya totomuamo nanitabonomolo da:tuduwatanako, ebete ebe tanalodo Godokono Totomu Tabo epetapi bilibilinomamo atumu a:ka:tuduwatanako. ☆ 15 Wiyasiya gaagaate gowela tetelo keba kunu kowagelenake, eba kunu la: magumulo idite idi kubaima: daloua:wenakoma, la: nanisiwale! Diyala, la: bilibilinomate gowela magumulo da:ba:elaoma!

16 Ebema: nale la: analemata, Godokono Uliyanano elawamo eba wapata:lamenalo la:le la:imano kateneno kuba ubi tanalamo gito akotudila:oala; 17 mabu lumagino kateneno ubi tanalate Godokono Uliyanano ubi tanalo eba odiyobolenalo, Godokono Uliyanano ubi tanalate ebe lumagino kateneno ubi tanalo atumu na:kodiyobolena. Nanitabola, ebe tanalate kubanomamo gowelana, ebema: la: nanitabokobi midipiate Godokono Uliyana eba kalakalaiminalo, la:le la:imano kateneno ubi tanalamo gito tudila:oma: modoboa: ☆

18 Numa:la:, la: Godokono Uliyanano elawamo ebenu ubi tanalamo da:tudila:wenakoma, ebe tetelo la: tutupima: eba eda:onalu ebenu Totomu Tabono temeteme tanalono elawo magumulo walo a:kilukuliawenama.

19 Nanitabola, epo iyatawanomola kateneno ubi tanalane kebe tanalate kemaimionale. Ebe iyaiya tanalo ebe kamiyale ega:walo buwelemele pilo tanalo, ega:walo tepo magumuno kuba daleyaya woki awokalilame tanalo, ega:walo buwelemela:tamo kateneno kuba ubi tabo gela tanalo, ☆ 20 ega:walo ida:da:lino uliyana amamalatele tanalo, ega:walo giwali osiyodilole tanalo, ega:walo gowelao tanalo, ega:walo apaminatui tanalo, ega:walo lumagi idino inamabuma: dowaya tanalo, ega:walo tepo magumune ela maiga tanalo, ega:walo lumagite ebe a:ka:tuwa: ebe kapiya malagidilo tanalo, ega:walo epo iyaiya anagiyamidale tanalo, 21 ega:walo lumagi idino wade mailono tanaloma: dowaya tanalo, ega:walo gamoda nio tanalo, ega:walo ilipo soliyomu osiyodilole tanalo, iyo, me ebe iyaiya kubakuba tanalo bilibilinomola. Nanitabola, piyate ibino kateneno kuba ubi tanalamo da:tudila:ona, iba:te ebe tanalo bilibilinomo ega:walo ebakobako kuba tanalo epetapi atumu a:kosiyodilolenaka. Ebema: nale la: dopamo kawiyaya keba kunu kanaletima eba kunu walo nakanalemata, la: nanisiwale! Piyate makomako kuba tanalo dosiyodilolenaka, iba:te Godokono Kawo Elawodawano duliwomolono wadewade dogodogo tanalo nanitabonomolo

---

☆ 5:19: 1Kol 6:9-10

a:kuwatema:na:.

<sup>22</sup> Wiyasiya lumagino okoli magumulo Godokono Uliyanano da:imite demaigana, ebe da:imite golanomoma: eba eda:nalo ebe magumulo wadewade tanalate ba:pola:nama:na:. Ebe iyaiya tanalo ebe epetapi nilakapolo malagidilole tanalo, tepo magumuno kalakala tanalo, milo tanalo, temeteme magumulo kodakodalo lamota:ona tanalo, nigologolopiatamo nilakapo awokalimi tanalo, epetapi gito walubili tanalo, nanidawama: eda: tanalo, <sup>23</sup> lumagi ebe a:ka:tuwa: ebe opamo iyati tanalo, ega:walo kateneno ubi tanalamo tuduwata: tanalo. Nanitabola, piyate makomako tanalo dosiyodilolenaka, ibi kuba osiyodilolepima: ka:la:ima: totomu tabo idite me opo kawonomolo kitana:. <sup>24</sup> Iyo, numa:la:, piyate ibino kateneno kuba ubi tanalo elawoelawonomo danakapulamiya, iba:te Ya:su Kelisokono nani epoma: eda:ona. ✧

<sup>25</sup> Ebema: modobola ale Godokono Uliyanano iyaiya ubi tanalo bilibilinomamo ba:tudila:onakoma:, mabu ebete ebene nanitabo igilo atamo iyalo ikaeamiya. <sup>26</sup> Ebe mabuma: a a:ka:tuwa: a walogoema: modoboa:, iyo, ale mibomibo tanalo epetapiatamo gito a:kikalaema: ega:walo ale epetapino inamabuma: iba:tamo a:ka:dowaoma:. ✧

## 6

*Nanitabokobi Midipi Magumulo Idite Idi Nilakapolo Nowalubinakomene*



1 Ebema: naimano nanitabokobi midipi ekakiala:, la: magumulo idite kuba osiyodilo tanalamo da:negamene, modobola la: piyate Godokono Uliyanatamo da:tudila:wenama, la:le ebe wadenomamo nowalubiyala: ebete kuba osiyodilo tanalone kolobigama:. Wiyasiya la:le ebe lumagitamo nilakapo awokalimi tanalodo ebe eba walubilo, ebe atu tetelo la: a:ka:tuwa: la:imano tanalo wadenomamo nulamenakiyala:, la:le Saitanakono elemasigi tanalamo atumu ka:na:guda:wekapoma:. ☆

2 Ega:walo tete epetapilo la:imano iyaiya tepo magumune demaimionaka ebe mibomibo tanalo tutuma: ka:midila:ema:, modobola la: epetapiate epetapi nowalubiinakiyala:, mabu la: ebe osiyodilo tanalodo Kelisokono kawo totomuamo ba:tudila:onakomata. ☆ 3 Wiyasiya la: nanisiwale. Godote a egegepima: eba genalo, wiyasiya a magumulo idite ebena wokilo ebe a:ka:tuwa: ebe kawodawama: da:midimene, ebe a:ka:tuwa: ebe a:da: kelemasigimene.

4-5 Ega:walo la: nanitabokobi midipi bilibilinomo magumulo, modobola idite damolama: eda:no ebe a:ka:tuwa: ebena woko osiyodilono iyaiya tanalo wadenomamo eba ulamenalo, ebena osiyodilole tanalo Godokono mulo wokiamo nanagilamenakomene, ebene ebete ma kunu kiyatawamene ebe osiyodilole tanalo da: wadewadenola: o da: kubakubanola:. Iyo, ebe tetelo ebe lumagite nanitabokobi mididawa idino tanalo anagiyamidamea:no, ebe a:ka:tuwa: ebena okoli tanalo kapiya

eba malagidilolo Godokono wadewade tanalo dulaemene, ebete nanitabo kalakala ebo kelaemene. ✧

<sup>6</sup>Ega:walo me tanalo idila. Kebe lumagite Wade Tabono iyatulame tanalo Godokono wokodawa idigodone duwatanako, modobola ebete ebe iyatulamedawa ebena maniamo ega:walo inamabu epetapiamo wadenomamo nowalubinakomene. ✧

<sup>7</sup>Ebene la: a:ka:tuwa: la: a:da: akomasigila:la:, lumagi idite Godoko malogolo ebe daedaedawama: demalagidilona, ebete walone ilipo kawonomo kelaemene. Nanitabola, lumagite kebe inamabu ebena pali damelamo damiomene, walone tetelo ebe atu inamabuate da:noloma:na: ebete gito kenaomene. ✧

<sup>8</sup>Ebene lumagite ebena kateneno ubi tanalamo tuduwatate kuba tanalo damiomene, ebe osiyodilo tanalona a:e wiyate pemaigate ebe gito ka:pelaemene, wiyasiya ebete Godokono Uliyanano ubi tanalamo tuduwatate wadewade tanalo damiomene, ebe tanalona ebetamo uwomua: igilo wiyate ka:pemaigamene. <sup>9</sup>Ebema: modobola a aimano wadewade osiyodilole magumulo elawoa:noma: a:keda:onama:, mabu ale elawoa:noma: eda:oa:no walone tetelo a aimano wadewade wiya kuwatemalema:, lumagite pali woko osiyodilo magumune wadewade inamabu keba kunu kuwatanakole eba kunu. <sup>10</sup>Me mabuma: kebe tetelo a wade tete duminakoma:, modobola a wade walubi tanalo biyatinakoma: iyaiya epo

---

✧ 6:4-5: Lom 14:12 ✧ 6:6: 1Kol 9:11,14 ✧ 6:7: Lom 8:13

bilibilinomatamo, iyo, ebe wadewade osiyodilole tanalo magumulo modobola ale dopamo nanitabokobi midipi kapiya alailame epo kawonomamo bemalagidilolenakoma:

*Polote Leta Uwomu Apulo Galesiya Sosi Epo Walo Da:ka:totomulателиya*

<sup>11</sup> Ebene me leta uwomu apulo na Polote na a:ka:tuwa: naimano kotamo tabo dakulolemo, la: me kapiyakapiya kawokawo akulole tabo nula:la:, iyo, lumagi idite me uwomu tabo kakulolea:

<sup>12</sup> Numa:la:, piyate la: Yua:pi dubu kawiya danaletanaka Yu epono tama itamida pukala kelawa:ema:, ibi piyate ibi a:ka:tuwa: ibino unu tama osiyodilole tanaloma: dotalogolena ebe dubula. Nanitabola, iba:te ibino tabamo ebe temeteme la:tamo ikalamenakota mabu ibi me tanaloma: na:toletoleona, Kelisote kewa olotolowalo da:iya iba:te ebe tanalono nanitabo magumu dawokalima:na:, Yu epo epetapiate ebe mabuma: iba:tamo kawokawo temeteme da:bikalaema:na:.

<sup>13</sup> Eiye, ebe dubate tama itamida pukala kawo tanalonomoma: eba gelanalo, iba:te wiyasiya Godokono Totomu Tabo epetapi gito wakalaminaka! Ega:walo ibino kuba osiyodilo tanalo idi ma kunula, ibi ubila la: Yua:pi dubu iba:godone tama itamida pukala delawa:ema, la:le ibino ubi tanalomo eba tudila:olo ibi a:ka:tuwa: ibi ebo kowalogolema:na:.

<sup>14</sup> Wiyasiya naimano tanalo eba kunua:! Amano Kawodawa Ya:su Kelisote kewa olotolowalo da:iya, nale ebe tanalono magumu

kapiya eba awokaliminalo ebo bamamanamo. Nanitabola, ebe magumudo me opono amama tanalono elawote naimano tepo magumulo iyalo olopoligadigiya, iyo, me opono iyaiya amama tanalo kuwatema: naimano ubi tanalate a:elaiya. <sup>15</sup> Ebe mabuma: lumagite tama itamida pukala delaemene ebe tanalo kawo tanaloo:, ega:walo lumagi idite lawea:dawama: deda:mene ebe tanalo atumu kawo tanaloo:. Kapiya tanalonomote kawoma: deda:na, ebe tanalo ebe lumagite Godokono elawamo ebena oli gudumu dawokalamene ebe tanalola. ☆ <sup>16</sup> Ebema: numa:la:, piyate me wokiamo da:tudila:onakoma:na:, modobola Godokono milo ega:walo lumagitamo kuba wiya ikamea: tanalo ebete iba:tamo nikalamenakomene, mabu ebe epo kapiyate ebena nani Isalaela epoma: eda:ona, epetapia:.

<sup>17</sup> Ebene me leta uwomu apulo nale la: kawiya ma kunu analemata, Ya:sukono wiya: woko mabuma: na dopamo kawokawo temeteme magumulo eba okolinalo, iyaiya tete epetapilo nanitabokobi midia:piate naimano ape bugomokobi a:midinakiya, iyo, epate ebe bugomo naimano apelo eba ulamenalo ebo iyatawaonaka, na Ya:sukono wiya: wokodawala. Numa:la:, nale dopamo iyaiya temeteme bilibilinomo epetapi uwatenakimo, ebema: me tetelo modoboa: idawate natamo temeteme idi walo ikanaema:. ☆

<sup>18</sup> O naimano nanitabokobi midipi ekakiala:, modobola aimano Kawodawa Ya:su Kelisokono

---

☆ **6:15:** Gal 5:6; 2Kol 5:17 ☆ **6:17:** 2Kol 4:10

nilakapo tanalote la: bilibilinomono tepo magu-  
mulo nitanamene. Me naimano tabo uwomula.  
Taula.

**GODOKONO WADE TABO**  
**The New Testament in the Fly River dialect of the**  
**Tabo language of Papua New Guinea**  
**Nupela Testamen long tokples Tabo (Fly River) long**  
**Niugini**

Copyright © 2006 The Bible Society of Papua New Guinea

Language: Tabo (Fly River) (Tabo)

Dialect: Fly River

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 9 Oct 2020

cbbd3ff2-0ca7-5896-b3fd-850bc0fd18b7